

元遺山詩箋註

冊三

元遺山詩集箋注卷六

烏程

施國祁北研箋

蔣炳枕山校

樂府

陵川集遺山墓誌云爲古樂府不用古題特出新意以寫怨思者又百餘篇

天門引

秦王深居不得近從破衡成欲誰信白頭游客困
咸陽憔悴黃金百斤盡海中仙人黃鵠舉大笑人
間爭腐鼠丈夫何意作蘇秦六印才堪警兒女古
來多爲虛名老不見阿房淨如掃千年虎豹守天
門一日牛羊臥秋草

黃鵠舉

韓詩外傳田饒語魯哀公曰夫黃鵠一舉千里豕君稻粟君猶貴之者以其從來遠也

蛟龍引

古劍咸陽墓中得挾開青雲見白日蛟龍地底氣

如虹土花千年不敢蝕洪鑪烈焰初騰精橫海已
覺無長鯨世上元無倚天手匣中誰解不平鳴割
城恨不逢相如佐酒恨不逢朱虛尙方未入朱雲
請盟槃合與毛生俱誰念田文坐中客只將彈鋏
嘆無魚

洪爐

吳越春秋干將曰昔吾師之作冶也金鐵之類不銷夫
妻乃斷髮剪指投之鑪使童子二百鼓橐壯炭金鐵乃

濡

朱虛

史記齊悼惠世家高后燕飲令朱虛侯劉章爲酒
吏章請以軍法行酒諸呂有一人醉者拔劍斬之尙

尙

方

漢書朱雲傳成帝時丞相安昌侯張禹以帝師位特進甚
尊重雲曰臣願賜尙方斬馬劍斷佞臣一人以厲其餘

湘夫人詠

木蘭芙蓉滿芳洲白雲飛來北渚遊千秋萬歲帝
鄉遠雲來雲去空悠悠秋風秋月沅江渡波上寒
煙引輕素九疑山高猿夜啼竹枝無聲墮殘露

北渚

九歌湘夫人帝子降于
北渚目眇眇兮愁余

輕素

沈約詩長
烟引輕素

湘中詠

楚山鶴鳴風雨秋
楚岸猿啼送客舟
江山萬古騷人國
猿鳥無情也解愁
西北長安遠於日
憑君休上岳陽樓

長安遠

晉明紀帝幼聰哲坐闕長安使來元帝問曰汝謂日與長安孰近對曰長安近不聞人從日邊來明日宴

羣臣又問對曰日近舉頭見日不見長安

岳陽樓

杜甫詩昔聞洞庭水今上岳陽樓

孤劍詠

鬱鬱重鬱鬱
夜半長太息
吟成孤劍詠
門外山鬼泣
清霜稜稜風
入骨殘月耿耿
燈映壁君不見
一飢縛壯士
僵臥時自惜
黃鵠一舉摩蒼天
誰念樊籠束修翼

渚蓮怨

阿溪何許來
素面浣風雨
寂寞煙中魂
依依欲誰

語

芳華怨

歸潛志元裕之李長源同鄉里各有詩名由其不相下頗不相咸李好憤怒元嘗云長源

有憤擊經元好滑稽李輒以詩譏罵元亦無如之何元嘗權國史院編修官時末帝召故駙馬都尉僕散

阿海女子入宮俄以人言其罪又蒙放出元因賦金谷怨樂府詩李見之作代金谷佳人答一篇以拒焉

一時士人傳以爲笑談元詩云云李詩云石家園林洛水濱粉垣碧瓦迷天津樓臺參差映金谷歌舞日

日嬌青春是時天下甲兵息江南已傳歸命臣永平以來太康治四海一口無窮人洛陽城中厭酺醪司

隸夜過不敢噴王門戚里爭豪侈車馬如水爭紅塵燒金斫玉延上客李倫豈輪趙王倫兩家炎炎貴相

軋笙竽嘈嘈妓成列珊瑚紅樹鞭擊碎步障青絲馬踏裂因緣睚眦貴人怒詔下黃門促收捕郵夫防吏

急喧驅河南牒繫御史府鐘鳴漏盡行不休生存華屋歸山邱綠珠香魂宛墜土侍兒忍居樓上頭君王

慈明宵率土妾身竄名籍民伍平生作得健兒婦狗走雞飛豈敢惡元和其詩先子稱工

娃兒十八嬌可憐亭亭裊裊春風前天上仙人玉

爲骨人間畫工畫不出小小油壁車軋軋出東華

金縷盤雙帶雲裾踏雁沙一片朝雲不成雨被風

吹去落誰家少年豈無恩澤侯金鞍繡帽亦風流
不然典取鸛鷖裘四壁相如堪白頭金谷樓臺悄
無主燕子不來花著雨只知環珮作離聲誰向琵琶
得私語無情灘瀟瀟翡翠兒有情蜂雄蛺蝶雌勸
君滿酌金屈卮明日無花空折枝

油壁

李賀詩油壁車夕相待李商隱詩油壁香車不再逢

金縷

隋禮志輦囊二品以上金縷宋禮志凡慶

節進金縷延壽帶

雁沙

李賀歌雲裾數步踏雁沙

恩澤侯

漢書有外戚恩澤侯表

金谷

石崇詩序有別館在河南縣界金谷澗

蜂蝶

李商隱詩花房與蜜脾蜂雄蛺蝶雌

金屈卮

于武陵詩

勸君金屈卮滿酌不須辭

折枝

古詩莫待無花空折枝

後芳華怨

江南破鏡飛上天三五二八清光圓豈知汴梁破
來一千日寂寞菱花仍半邊白沙漫漫車轆轤
雞絃中杜鵑哭塞門憔悴人不知枉爲珠娘怨金

谷樂府初唱娃兒行彈碁局平心不平只今雄蜂
雌蝶兩不死老眼天公如有情白玉搔頭綠雲髮
玫瑰面脂透肉滑春風著人無氣力不必相思解
銷骨洛花絕品姚家黃揚州銀紅一國香千圍萬
繞看不足雨打風吹空斷腸丹砂萬年藥金印八
州督不及秦宮一生花裏活長門曉夕壽相如儘
著千金買消渴

破鏡

古詩何日大刀頭破鏡飛上天又詩話陳太子舍人徐德言有破鏡詩

鯢雞

楚辭鴟雞惆悵而悲

鳴琴賦鴟雞游絃古相和歌有鴟雞曲

彈棋

李商隱詩莫近彈棋局中心最不平

丹砂

本草丹砂久服

通神明不老梁武樂府但使丹砂就能令億萬年

秦宮

長吉句

消渴

西京雜記相如素有消渴疾及

還成都悅文君之色遂發痼疾乃作美人賦以自刺

結楊柳怨

長樂坡前一杯酒鄭重行人結楊柳可憐楊柳千

萬枝看看盡入行人手輕煙細雨綠相和惱亂春
風態度多路人愛是風流樹無柰朝攀暮折何朝
攀暮折何時了不道行人暗中老素衣今日洛陽
塵白髮明朝塞城草柳色年年歲歲青關人何事
管離情春風誰向丁寧道折斷長條莫再生

素衣

古詩京洛多風
塵素衣化為縗

秋風怨

碧瓦高梧響疎雨坐倚薰籠時獨語守宮一著死
生休狗走雞飛莫爲女雲間簫鼓夜厭厭禁漏誰
將海水添一春門外羊車過又見秋風拂翠簾總
把丹青怨延壽不知猶有竹枝鹽

守宮

漢書東方朔傳注守宮蠱名也術家云以器養之食以
丹砂滿七斤搗治萬杵以點女體終身不滅若有房室

之事則滅矣○李賀
詩花房夜搗紅守宮

歸舟怨

渡頭楊柳青復青
閨中少婦動離情
只從問得狂夫處
夜夜夢到洛陽城
南風吹櫓聲
北雁鳴嚶嚶
江流望不極
相思春草生

征人怨

瀚海風煙掃易空
玉關歸路幾時東
塞垣可是秋寒早
一夜清霜滿鏡中

瀚海

史霍去病傳
登臨瀚海

塞上曲

平沙細草散羊牛
一簇征人在戍樓
忽見隴頭新雁過
一時迴首望南州

西樓曲

游絲落絮春漫漫
西樓曉晴花作團
樓中少婦弄

瑤瑟一曲未終坐長嘆去年與郎西入關春風浩
蕩隨金鞍今年匹馬妾東還零落芙蓉秋水寒并
刀不剪東流水湘竹年年露痕紫海枯石爛兩鴛
鴦只合雙飛便雙死重城車馬紅塵起乾鵲無端
爲誰喜鏡中獨語人不知欲插花枝淚如洗

并刀

杜甫詩安得并州快剪刀
剪取吳淞半江水

後平湖曲

越女顏如花吳兒潔如玉天教並牆居不著同被
宿美人一笑千黃金連城不博百年心樓上墻頭
無一物暮爨朝春一生足秋風拂羅裳秋水照紅
妝舉頭見郎至低頭采蓮房郎心只如菱刺短妾
意未覺藕絲長與郎期何許眼礙同舟女春波澹
澹無盡情雙星盈盈不得語十里平湖艇子遲岸

花汀草伴人歸鴛鴦驚起東西去唯有蜻蜓接翅飛

越女

宋之問句

洧川行

洧川道邊日欲西誰家少婦掩面啼漫漫長路行
不徹粉綿鏡衣手自攜自言娼家女家在梁門東
夫壻輕薄兒新人不相容憶初在家時只辦放嬌
慵耶娘惜女如惜玉近前細看面發紅無端嫁作
蕩子婦流落棄擲風埃中可憐桃李花顏色嬌蒙
茸朝看花枝好暮看花枝空安得明珠三百斛重
簾複幕圍春風

粉綿

陸游詩粉綿磨鏡不忍照

面紅

樂府今日牛羊上丘壘當時近前面發紅

長安少年行

黃衫少年如玉筆生長侯門人不識道逢豪客問
姓名袖把金鞭側身揖臥馳行橐鏡帕蒙石榴壓
漿銀作筒八月蒼鷹一片雪五花驕馬四蹄風日
暮新豐原上獵三更歌舞灞橋東

黃衫

唐書禮志明皇嘗令樂工少年姿秀者衣黃衫文玉帶立左右杜甫詩黃衫年少來宜數不見門前東逝波

黃金行

中州集王鬱字飛伯少日作樂府擬古別離有黃鶴樓高雲不飛鸚鵡洲寒星已曙之句

人多傳之其後入京師大爲李欽叔所稱與之詩云詩句嬌國風下者猶楚辭贈詩者甚多有云憶昔頻亭見飛伯恍若夢中逢李白又云紫陁仙人今淵雲騎風御氣七尺身又云良金元有價白璧况無瑕又云王郎少年詩境新氣象慘澹含古春筆頭仙語復鬼語只有溫李無他人飛伯用是頗自貴重云○歸潛志王鬱飛伯奇士也少余一歲與余交最深儀狀魁奇目光如鶻步武翩然相者云病鶴狀也少居釣臺閉門讀書不接人事數載爲文閎肆奇古動輒數千百言法柳柳州歌詩飄逸有太白氣象初爲御史程公震所知繼爲李翰林欽叔麻徵君知幾史學優嘉賞且共爲延譽籍籍正太初余先子令葉飛伯持諸公書來投先子異其文置門下遂與余定交每觴酒讌游無不在已而入南京見趙雷諸公皆稱之不

已布衣少年名動京師後因下第西游洛中余居淮
 陽凡三過留輒數月唱酬談論相高每相別輒以所
 著相寄且相商訂爲益正大未南京被圍復相守圍
 城中天興改元秋飛伯忽過余別曰吾跼伏陷穽不
 自得今將突圍遠舉然死生未可知因出其所作王
 子小傳屬余曰茲不朽之託也余不能止之而去三
 年不知存亡丙申歲南游過交游輩說飛伯初爲東
 諸侯兵士所得其將厚遇之飛伯徑行不設機久之
 爲其下所忌見殺臨終懷中出書曰是吾平生著述
 可傳付中州士大夫王飛伯死矣計其時年甫三十
 余哭諸鎮陽蓋飛伯爲人雖聰穎絕人然涉世日淺
 頗驚傲不通徹此所以不免余常見其舉止言談無
 顧忌旁爲儼然而飛伯益自信莫能戒以是常得謗
 議爲俗人所憎才氣稍有鍛鍊其文章所至豈易量
 哉今而中道摧折不迄于大成可以爲斯文嘆其詩
 文往來與余最多有淮陽唱和南頓聯句古賦銘贊
 書序數十首遭亂皆在余橐中今仍略載其小傳云
 又受知最深者曰樗軒公完顏璫閑閑公趙秉文余
 先子雷淵李獻能王若虛麻九疇史學優程震宋九
 嘉其游從最久者曰李汾楊宏道元好問魏璠張邦
 直杜仁傑曹居一雷瑄冀禹錫張介王說王采芩趙
 著張甫王鑄劉輯李全劉源楊奐胡權徒單公履呂
 鯤史環李試侯策張傑劉郁左坦牛汝霖尤虎遂烏
 林答爽僧性英諸公至于心交者惟李治劉祁二人
 而已○中州集密國公璫王生以秋騷見示復以此
 謝之詩又李欽叔題飛伯詩囊詩又送歸陽翟詩○

明一統志釣魚臺在順天府西花園釣臺下有泉涌出爲池其水至冬不竭相傳金人王鬱隱此

王郎少年詩境新氣象慘澹含古春筆頭仙語復
鬼語只有溫李無他人天公著詩貧子身子曾不
知乃自神人間不買詩名用一片青衫衡霍重兒
貧女富母兩心何論同袍不同夢入門喚婦不下
機淚子垢面兒啼飢君詩只有貧女謠何曾夢見
金縷衣外家翁媪日有語嫁女書生徒爾爲昆陽
城下三更酒醉膽輪囷插星斗一昔詩腸老蛟吼
十尺長人墮車走斫頭不屈三萬言欲向何門復
低首何人壽我黃金千使君破鏡飛上天

古春

李賀詩古春年年

蘇軾詩劍在牀頭詩在手不知誰作蛟龍吼

黃金

李白詩綺羅錦

鑄段有贈黃金千

隋故宮行

渭川楊柳先得春二月鸞啼百轉新長春宮中千
樹錦暖日晴雲思煞人君王半醉唱吳歌絳仙起
舞嚙翠蛾吳兒謾說曾行樂三十六宮能幾多千
秋萬古金銀闕海沒三山一毫髮繁華夢覺人不
知留得寒蜚泣秋月

吳歌

隋五行志大業十一年煬帝飲酒大醉因賦詩令美人吟咏○通鑑帝好爲吳語嘗夜置酒語蕭后曰且共樂

飲耳因引

絳仙

古樂府煬帝幸江都龍舟殿脚女中有吳絳仙者柔麗不與羣輩齒帝吟持箴篇以賜之

三十六宮

駱賓王詩漢家離宮三十六

解劍行

古劍黑於漆鬱鬱動星文摩挲二十年今日持贈
君長鯨鼓浪三山沒知君不是泥中物袖間一卷
白猿書未分持刀買黃犢壯懷風雲鬱沈沈慚媿
漂母無千金長安侏儒飽欲死萬古不解天公心

北風浩浩吹行客隴水無聲雪花白荆卿墓頭秋
草乾擊筑行歌欲誰識君不見秦相五羖皮去時
烹雞炊屢屢又不見敝裘蘇季子合從歸來印纍
纍丈夫墮地自有萬里氣翕忽變化安能知大冠
如箕望吾子富貴同生亦同死

星文

王維詩聊持寶劍動星文

白猿書

拾遺記周羣妙閑算術識說游岷山采藥見一白猿從絕峯而下

下化爲一老翁握中有玉版長八寸以授羣

隴水

古樂府隴頭流水鳴聲嗚咽

墮地

蘇軾詩天驥墮

地走萬里端可期

征西壯士謠

三十未有二十強手內虵矛丈八長總爲官家金
印大不怕百死向沙場捉卻賀蘭山下賊金鞍繡
帽好還鄉

蛇矛

隴上歌七尺大刀配齊環丈八蛇矛左右盤

賀蘭山

北邊備對賀蘭山在靈州保靖縣山有林

木青白望如駸馬北
人呼駸馬爲賀蘭

望雲謠

涉江采芙蓉芙蓉待秋風登山采蘭苕蘭苕霜早
彫美人亭亭在雲霄鬱搖行歌不可招湘絃沈沈
寫幽怨愁心歷亂如曳繭金支翠蕤紛在眼春草
迢迢春波遠

望歸吟

塞雲一抹平如截塞草離離臥榆葉長城窟深戰
骨寒萬古牛羊飲冤血少年錦帶佩吳鉤獨騎匹
馬覓封侯去時只道從軍樂不道關山空白頭北
風吹沙雜飛雪弓絃有聲凍欲折寒衣昨夜洛陽
來腸斷空閨搗秋月年年歲歲望還家此日歸期
轉未涯誰與南州問消息幾時重拜李輕車